

FUAFUAGA FAATAATITIA MO LE VA'AIA LELEI O I'A MA FIGOTA

A LE AFIO'AGA

O

SOLOSOLO

(Tusia: Aso 27 Aperila, 1998)

Saunia:

Pule mamalu a Alii ma Faipule ma tagatanuu o le afio'aga o Solosolo, aemaise le lagolagosua a le Ofisa o Faigafaiva o le Matagaluega o Faatoaga ma Faigafaiva.

FAASOLOGA

1	Faatomuaga	3
2	Faamatalaga e uiga i le Afio'aga	3
2.1	Faamatalaga o foliga va'aia faanatura o le Afio'aga	3
3	Tulafono i Aso ua mavae ma Aso nei	4
3.1	Aotelega o tulafono o le siosiomaga o le gataifale ma faigafaiva i Aso ua mavae ma ona po nei	4
4	O lenei Fuafuaga Tatau	5
4.1	Autu	5
4.2	Tapenaga	6
5	Fuafuaga Faataatitia	7
5.1	Ina ia faamalosiā tulafono faale-nuu e faasaina ai faigafaiva le talafeagai : fanai'a, ava niukini ma vailaau oona	7
5.2	Ia faasaina tu'iga ma faamo'a	8
5.3	Ia faasaina ona toe lafoa'i lalasi i le sami	8
5.4	Ia faasaina Upega ma Tili matanini'i	9
5.5	Ia faasaina faigafaiva mai isi Afio'aga	9
5.6	Ia faasalalauina tulafono a le Afio'aga	10
5.7	Ia aoina mai i uta le alamea ma faatama'ia ai	11
5.8	Ia iloiloina le tulaga talafeagai o le faasaina o se vaega o le gataifale o le Afio'aga	11
5.9	Ia iloiloina le tulaga talafeagai ma le lelei o le gataifale mo le tufaina atu ma le faa-faatoagaina o nisi figota	12
5.10	Ia una'ia faigafaiva i tua'au ma aoaoga mo faigafaiva	13
5.11	Ia faaaogaina le Mana o Talosaga	14
6	Talosaga	14
6.1	Talosaga a le Afio'aga	14
7	Toe iloiloina o lenei Fuafuaga Tatau	15

1. FAATOMUAGA

O lenei fuafuaga o le Pulega o le Siosiomaga o le Gataifale ma le Va'aia Lelei o I'a ma Figota, na saunia e le itupa o Aumaga, Tina ma Tamaitai, aemaise le Pule mamalu a Alii ma Faipule o le Afioaga o Solosolo, faatasi ai ma le lagolagosua a le Vaega o Faigafaiva, o le Matagaluega o Faatoaga ma Faigafaiva.

2. FAAMATALAGA E UIGA I LE AFIOAGA

2.1 Faamatalaga o Foliga Va'aia Faanatura o le Afioaga

FAALAUATELE

<u>FAAMATALAGA</u>	<u>AOFAIGA</u>
O le faitau aofai o tagata o lenei alalafaga:	2000 – 2500
O le aofai o aoga i totonu o lenei afioaga : Aoga Tulagalua	1
O le aofai o falesa i totonu o le alalafaga : E.F.K.S	1
Katoliko	1
Metotisi	1
Mamona	1
Nasareta	1
Assembly	1
O le umi o le aau o le afio'aga (mita)	2 ½ - 3 maila
O le mamao o le aau mai le matafaga (mita)	100 – 150 mita
O le loloto o vaega e aupito sili ona loloto o le aloalo pe a pe le tai i le taimi nei	3 futu
O le loloto o vaega e aupito sili ona loloto o le aloalo pe a pe le tai i taimi ao lei afaina i afā	4 futu

FAALAUATELE

<u>FAAMATALAGA</u>	<u>AOFAIGA</u>
O le faitau aofai o tane faifaiva e fagogota i le sili atu ma le tasi le aso i le vaiaso	10 – 20
O le faitau aofai o tina faifaiva e fagogota i le sili atu ma le tasi le aso i le vaiaso	10 – 20
O le aofaiga o tagata e fagogota i tua'au mai le tasi le aso i le vaiaso	10 – 20
O le aofaiga o paopao e faaaogaina mo faigafaiva i totonu o le afio'aga nei	5

E faatagaina ni tagata mai nisi alalafaga e fagogota i lo outou gataifale?

Ioe

<u>Ituaiga I'a /Figota</u>	<u>Ituaiga Faigafaiva</u>	<u>Taimi faaalu mo le 1 le tau'i'a/ 10 I'a/ Ofu</u>	<u>Taimi Nei</u>	<u>10 Tausaga ua te'a</u>
<i>I'a maua soo se (5)</i>				
1. Alogo	Fana / Mata	2 – 3 itula		½ itula
2. Pone	Fana / Mata	2 – 3 itula		½ itula
3. Fuga	Fana / Mata	2 – 3 itula		½ itula
4. Gatala	Fana / Mata	2 – 3 itula		½ itula
5. Lo	Fana / Mata	2 – 3 itula		½ itula
<i>Figota maua soo se (3)</i>				
1. Faisua	Fai fugafuga	2 – 3 itula		½ itula
2. Alili	Lama	2 – 3 itula		½ itula
3. Aliaio	Lama	2 – 3 itula		½ itula

<u>Ituaiga I'a /Figota</u>	<u>Isi Taumafa o le sami</u>	<u>Taimi faaalu mo le 10 mea ua ta'ua</u>
Upega	Tuitui	seasea
Ofe	Faisua	aso atoa
Toso (pa)	Ula	3 – 4 itula
Afa	Pa'a	3 – 4 itula
	Sea (lapoa, laiti)	seasea
	Laumei	seasea

VAEGA TAUA O LE SIOSIOMAGA MO FAIGAFIFA

<u>Vaega</u>	<u>Vaega Taua (sikuea mita)</u>	<u>Taimi Nei</u>	<u>Sefulu Tausaga ua te'a</u>
Togatogo	-	-	-
Amu	6000		300,000
Vaovao o le Sami	-	-	-

3. TULAFONO I ASO UA MAVAE MA ASO NEI (Siosiomaga o le Gataifale ma Faigafaiva)

3.1 Aotelega o Tulafono o le siosiomaga o le gataifale ma faigafaiva i aso ua mavae ma ona po nei.

Tulafono a le afio'aga o Solosolo i aso ua mavae
O le faasaina o faigafaiva le talafeagai:-

- Fanai'a
- Ava niukini
- Vailaau oona

O nei tulafono sa faasalalauina i le leitio (2AP)

O nei tulafono o lo'o faamamaluina ma amanaiaina e pei ona sa i ai i le taimi muamua, faatoa faamamaluina ai i totonu o le afioaga o Solosolo. Ae peitai e le o mamalu i nei vaitaimi ona o le le amanaiaina e isi tagata o le afioaga atoa ai ma isi afioaga, o nei tulafono.

O nisi o mafuaaga e pei ona taua e aofia ai:-

- Leai o se lagolago mai le Malo
- O nisi o tagata o loo mafaufau mo le taimi nei ae le o mafaufau i le taimi o i luma, faapea foi le lumanai o tupulaga.

O nei mafuaaga uma, o loo aafia i le Fuafuaga o le Pulega o le Siosiomaga o le Gataifale ma le Va'aia Lelei o I'a ma Figota.

E le gafatia na o le malosia faaletulafono a le Malo ona malu puipuia ai le siosiomaga o le gataifale ma ona tamaoiga. E utiuti tulaga tau tupe ma to'agaogao foi le aufaigaluega a le Malo latou te faamalosia ma una'ia tulafono tau faigafaiva i nuu taitasi o Samoa i Sisifo. O le fofu talafeagai o lo'o i aao o tagata o lo'o soifua ma alaala i le afio'aga faatasi ai ma le faamalumaluga a le Fono a Alii ma Faipule. O lenei tali o le a le pine ona una'ia tagata latou te galulue faatasi ina ia malupuipuia ma faaleleia le siosiomaga o le gataifale ma ona tamaoiga mo nei ma tupulaga o le lumanai.

4. O LENEI FUAFUAGA TATAU

4.1 Autu

O lenei fuafuaga ua taua ai ni faatinoga e manaomia ina ia maua ai sona taunuuga maumaututu. O le faamoemoe maualuga o le Malo, ina ia faaleleia le soifua manuia o tagata o le afio'aga, ma ia faatupulaia atili mea taumafa mai le sami. O lea e manaomia ai tagata uma ina ia avea nei faatinoga e puipuia ai le siosiomaga o le gataifale ma ia fuafua tatau ai le fagotaina o i'a ma figota. O nei fuafuaga na fa'aalia e le Komiti Faufautua o le Va'aia Lelei o i'a ma figota (KFVL) i le afio'aga e avea ma autu.

“Ina ia puipuia le siosiomaga o le gataifale ma le toe faatupulaia o i'a ma figota mo tupulaga o le lumanai”

Na ioeina e le fonotaga a le Komiti Faufautua mo le Va'aia Lelei o i'a ma figota (KFVL), i le Aso 16 Aperila 1998, o le Komiti (KFVL) lava lenei latou te faamalosia ma una'ia vaega eseese uma o le afio'aga aua le puipuia ma le faasaoina o atina'e ma alamanuia o le gataifale o Solosolo. O lenei foi Komiti o lo'o gafa ma le tapenaga o tulafono aemaise o vaega uma e tatau mo le fuafuaga tatau. O le tele foi o lenei tapenaga, o le a tuuina atu i le Pule Mamalu a Alii ma Faipule mo le pasiaina. O lenei fuafuaga ua faamoemoe ina ia o'o atu i le tolu tausaga po'o le sili atu fo'i o lo'o faaaogaina pea, ae afai e i ai se suiga, ua ao loa ona toe su'esu'eina lenei fuafuaga.

4.2 Tapenaga

O lenei tapenaga sa saunia lava e tagatanu'u o le afio'aga o Solosolo faatasi ai ma ni fautuaga ma le lagolagosua a le Ofisa o Faigafaiva o le Matagaluega o Faatoaga, ma Faigafaiva. O se oototoga lenei o le tapenaga o le Pulega o le Siosiomaga o le Gataifale ma le Va'aia Lelei o i'a ma figota.

Feiloaiga Muamua: O lenei feiloaiga muamua sa faafesootaia lea e Apulu Sefo Fonoti i le Aso 4 Mati 1998. O Mati i lona Aso 11, sa tauaofia ai le uluai fono a sui o le Ofisa ma le Afioaga mo le faamalamalamaina ma le taliaina o lenei polokalame.

Vaevaeina o Vaega: O vaega sa vaevaeina iai, e aofia ai Matai, Aumaga ma le Komiti a Tina ma Tamaitai. Sa feloa'i nei vaega e tolu ma sui o le Ofisa o Faigafaiva, ma faatalatalanoaina ai faafitauli o le gataifale o lo'o alia'e i le afio'aga atoa ai ma ni fofu talafeagai e faaono foia ai nei faafitauli.

Sui auai o le Afio'aga i le uluai fono

Vaega Matai:	Leiu Sefo Tafea Ene	Taiatu Mose Leiu Pa Sone Savaiinaea Paulo	Segaula Loi Nuafesili Miliona
Vaega Tina:	Stella Lafaele Malia Leafa	Matalena Iulisesese	Kapeneta Tafea Muliauma Segaula
Vaega Aumaga:	Vailuu Lave Leafa Tanu	Faleafa Leota	Taulapapa Leota Faapue Esera

Komiti Faufautua mo le Va'aia Lelei o i'a ma figota (KFVL): I lenei Komiti, o lo'o aofia ai sui ta'i toatolu sa filifilia mai i vaega taitasi latou te molia finagalo fa'aalia o vaega eseese i le fono a le Komiti. O le Komiti la lenei sa latou tuu faatasia faamaumauga ma faamatalaga mai i nei vaega taitasi ma sa mafai ai ona latou tapenaina se ata faata'ita'i o le Pulega o le Siosiomaga o le Gataifale ma le Va'aia Lelei o i'a ma figota. O lenei fuafuaga o lo'o a'afia ai lagona o tagata o le afio'aga i le puleaina o Faigafaiva ma le Siosiomaga o le gataifale.

Sui o le Komiti mo le Va'aia Lelei o I'a ma Figota

Komiti Matai:	Nua Tui Tafea Ene Alailefue Iosua Taulapapa Keli	Lemafa Poa Segaula Loi Salia Fiapa'i Taaloga Su'a (pulenuu)	Taiatu Mose Ega Tavita Seugalii Ilalio
Komiti Tina:	Line Taaloga	Ioka Ega Tumema Kalapu	Penei Gafatasi
Komiti Aumaga:	Foki Ilaoa	Joe Leota	Palanapa Fuamatu

Tauaofiaga o le Fono Tele: O le a tauaofia lenei Fono i le Aso 27 Aperila 1998 mo le taliaina, fautuaina atoa ai ma se teuteuga o le fuafuaga muamua o le Pulega o le

Siosiomaga o le Gataifale ma le Va'aia Lelei o i'a ma figota. O le a filifilia foi se Komiti mo le Va'aia Lelei o i'a ma figota i lenei fonotaga.

5. FUAFUAGA FAATAATITIA

O fuafuaga faataatitia o ni gaoioiga ua faamoemoe e faaono foia ai faafitauli ua faataatitia ma faailoa mai e vaega eseese o le afioaga. E lua (2) ituaiga o fuafuaga faataatitia ua fuafuaina, ma o le fuafuaga ua aupito sili ona taua,

1. O fuafuaga faataatitia le au a faaagaaga mo nuu po'o afio'aga

2. O fuafuaga faataatitia ua faamoemoe lea mo le Ofisa o Faigafaiva

O gaoioiga uma lava ua faamoemoe e faatino ai fuafuaga faataatitia mo le Ofisa o Faigafaiva e ao ona faamaonia e le Faatonu Lagolago o Faigafaiva a le Matagaluega o Faatoaga ma Faigafaiva. O nei fuafuaga faataatitia uma ua faamoemoe lo latou faataunuuna i le lagolagosua mai o le afio'aga ma ona tagatanuu. O fuafuaga faataatitia uma o le a leai se aafiaga tuusao a le Ofisa o Faigafaiva, ua i ai le faamoemoe o le a fa'auau pea ona tuuina atu ni fesoasoani i le afio'aga e ala atu i le faamalamalamaina o pepa o faamatalaga atoa ai ma le faia o ni tautalaga i vaega eseese e pei o aoga ma faalapotopotoga faa-le-ekalesia.

5.1 Ina ia faamalasia tulafono faale-nuu e faasaina ai auala tau faigafaiva le talafeagai: fanai'a, ava niukini ma vailaau oona

Otootoga

O nisi o auala tau faigafaiva ua mautinoa lo latou tulaga ogaoga i le faatamaiaina o le alititai (amu) ma le tele o meaola o le gataifale, ma o se faataitaiga o nei ituaiga o faigafaiva le talafeagai, e pei o vaila'au ta-lavalava, ava niukini, fanai'a, tuiga ma faamo'a. Ua le gata ina faatama'ia ai se vaega tele o le alititai (amu), ae ua faapena foi ona faaumiumi ai se taimi e mafai ai ona toe tau faatupuina le tele o meaola o le gataifale ua aafia ma mamate i nei ituaiga o auala faafaigafaiva. A faaleagaina le alititai, o lona uiga o le a leai ni i'a ma ni figota e toe maua ai.

Fuafuaga Faataatitia a le Afio'aga.

Talu ai ona o le tulaga pagatia ua iai le gataifale o lenei nuu o Solosolo o lea ua a'e ai se finagalo autasi i le Komiti ua filifilia ina ia matua faamalasia loa tulafono a le afioaga e faasaina ai faigafaiva le talafeagai e pei o fanai'a, ava niu kini ma vailaau oona. O le puipuiga ma le faamamaluina o nei tulafono o le a i aao lava o le Pule Mamalu a Alii ma Faipule faatasi ai ma le lagolagosua a tagatanuu o le afioaga.

Fautuaga

Ina ia faamalasia ma faamamaluina loa tulalono ua taua i lalo, a le afio'aga mo le faasaina o faigafaiva le talafeagai.

Tulafono

“Mo Ie mamalu o Ie atunuu atoa ai ma tagatanuu o Solosolo, Ua matua faasaina lava faigafaiva Ie talafeagai e pei o fanai'a, ava niukini, ma vailaau oona ona toe faatinoina i gataifale o Solosolo e amata mai i Ie tuaoi i Sasae e o'o atu i le tua'oi i Sisifo o le afio'aga”

Faasalaga

Mo tagata o le afioaga e solia lenei tulafono, o le a faia iai finagalo o Alii ma Faipule o le Afio'aga, ae a le usitaia se faasalaga e tuuina iai, o le a molia loa i le tulafono a le Malo. O tagata mai isi afioaga, o le a molia sa'o i le tulafono a le Malo.

Taimi Fautuaina

Ina ia aloaia le faamamaluina ma le faamalositia o nei tulafono pe a mavae le Fono tele e pasia ai le Pulega o le Siosiomaga o le Gataifale ma le Va'aia Lelei o i'a ma figota i le Aso 27 Aperila, 1998.

Fuafuaga Faataatitia a le Ofisa o Faigafaiva

O le a fesoasoani le Ofisa o Faigafaiva mo le faatinoina o fuafuaga faataatitia a le afioaga e ala atu i lana polokalame fesoasoano mo aoaga tau faigafaiva.

5.2 Ia faasaina tu'iga ma faamo'a

Ootoga

Ua maituina, o se tasi lenei o ituaiga faigafaiva le talafeagai o loo matua faaleagaina ai amu aemaise o i'a ma figota laiti. Afai ae faaauuina pea nei ituaiga faigafaiva, o le a sili atu ona telē se afaina o amu o loo fai ma ofaga o i'a ma figota o le gataifale.

Fuafuaga faataatitia a le Afio'aga

Na faaalua e vaega taitasi o le afioaga le tatau ona toe faamautuina le tulafono e faasaina ai tu'iga ma faamo'a i gataifale o Solosolo, aua ua mautinoa le faaleagaina ai o amu faapea isi meaola nini'i o le gataifale. Ua matua lagolagoina e le Komiti (KFVL) lenei manatu, ma ua tuu faatasia ai loa lenei fuafuaga i le tulafono o faigafaiva le talafeagai e pei ona ta'ua i luga, (4.1) ma le faasalaga o loo tusia ai mo le o le a toe faia lenei faigafaiva o le tu'iga ma le faamo'a.

Fuafuaga faataatitia a le Ofisa o Faigafaiva

O le a fesoasoani mai le Ofisa i le faamautuina ma le faamalositia o lenei tulafono. E lagolagoina foi e le Ofisa soo se fuafuaga a le afioaga ua talafeagai lelei ma le tulafono faale-malo mo le puipuia lelei o le gataifale ma le siosiomaga.

5.3 Ia faasaina ona toe lafoa'i lapisi i le sami

Ootoga

O le lafoai o otaota poo lapisi i le sami, ua avea ma mafua'aga o le faateleina ai namu ma manunua ai nisi o le aufaifaiva i nisi o apisi pei o atigiapa, atigifagu ma uamea. Ua faapena foi ona avea ma punaaga o faamai ma tulai mai ai, o se nofoaga le talafeagai mo le ola lelei o i'a ma figota i le gataifale.

Fuafuaga faataatitia a le Afio'aga

Ua fautuaina e le Komiti (KFVL) aiga taitasi o le afioaga, ina ia eliina ni lua i tuāmaota ma tuālaoa e lafoai iai otaota ma lapisi. Ua talitonu le Komiti o le auala pito sili lea ona saogalemu ma lelei mo le fo'iaina o lenei faafitauli tau i le lafoa'iina o otaota ma lapisi i le gataifale o le afioaga. O le faatinoina o lenei fuafuaga, o le a i le vaaiga a le Pulenuu, Komiti ma le nuu atoa.

Tulafono

“Ona o le fia puipuia lava o le siosiomaga ma le faasao i le gataifale o lenei afio’aga o Solosolo, o lea e faasilasila atu ai i le mamalu o le atunuu femalagaa’i i Sasae ma Sisifo, atoa ai ma tagata o le afioaga, ua matua faasaina soo se ituaiga lapisi ona toe lqfoai i le gataifale”

Faasalaga

Mo tagata uma o le afioaga o le a solia lenei tulafono, o le a faia iai le finagalo o le Pule mamalu a Alii ma Faipule o le afioaga.

Mo tagata ese, o le a molia i le tulafono a le Malo.

Fuafuaga faataatitia a le Ofisa o Faigafaiva

O faamatalaga eseese e faatatau i aafiaga o le siosiomaga o le gataifale ma ona tamaoiga, o le a fesoasoani atu ai le Ofisa e fautuaina le afioaga i le taua o le teu maluina o lapisi ma otaota i nofoaga talafeagai. O le a tuuina atu foi ni pepa o faamatalaga mo le faalauteleina o le malamalama i ia tulaga.

5.4 Ia faasaina Upega ma Tili matanini’i

Otootoga

O le faaaogaina o upega ma tili mataninii, ua maitauina le tele o i’a laiti ua faatamaia ai. Ua iai le talitonuga o le a oo atu i se tulaga faaletonu i’a maua, pe a faaauuina pea le faaaogaina o nei ituaiga faigafaiva. O le a oo ina faaitiitia i’a e mafai ona oo atu lo latou lapopoa e maua ai le avanoa e fanafanau ma tautuufua ai.

Fuafuaga faataatitia a le Afio’aga

Ua faailoa mai e le Komiti (KFVL) o le faaaogaina o upega ma tili matanini’i, o se tasi lea o mafuaaga ua faaititia ai i’a maua i le gataifale. O lea ua aiaia ai loa se tulafono ina ia faasaina ai upega ma tili mataninii ona toe faaaogaina i fagotaga i le gataifale o le afioaga. Ua faapea foi ona faaalua mai e le afioaga lo latou matua lagolagoina o le tulafono a le Malo ua iai nei mo le faatapulaaina o mataupega ma tili

Tulafono

“Ua matua faasaina lava ona toe fagotaina upega tatao e i lalo ifo o le 2 inisi (50 mm) lona mataupega, faapea ma tili ia le i lalo ifo o le 1.2 inisi (30 mm), i gataifale o Solosolo”

Faasalaga faale-nuu

O se tagata o le afioaga e solia lenei tulafono o le a faia iai le finagalo o le pule mamalu a Alii ma Faipule o le afioaga.

O tagata mai isi nuu, o le a molia sa’o i le tulafono a le Malo.

Fuafuaga faataatitia a le Ofisa o Faigafaiva.

O se lagolagosua mai le ofisa o Faigafaiva e ala i lana Polokalame Fesoasoani, o le a tuuina atu pepa o faamatalaga e saga faamautuina ma faamaopoopoina ai lenei tulafono.

5.5 Ia faasaina faigafaiva mai isi afioaga.

Otootoga

O fagotaga mai isi nuu e faaaogaina ai faigafaiva e le talafeagai e iai, ava niukini, fanaia,

vailaau oona, lama moliuila ma le faaaogaina o mea manava, ua mautinoa le matua faaleagaina ai o le siosiomaga o le gataifale. Ua le gata i lea, a ua faaititia ai i'a ma figota o loo manaomia e tagata o le afioaga mo taumafa.

Fuafuaga faataatitia a le Afio'aga

Ua faaalua mai e le Komiti (KFVL) le tatau ona faia o se tulafono e faasa ai nei faigafaiva e pei o le faaaogaina o:

- Faigafaiva le talafeagai
- Lama moliuila
- Mea manava

O le autu moni o lenei tulafono ona o nisi o tagata mai isi afioaga o loo latou aumaia nei faigafaiva ma faatinoina i lo latou gataifale ma faatamaia ai.

Tulafono

“Ua matua faasaina lava tagata mai isi afioaga ana toe fagotaina gataifale o Solosolo e faaaogaina ai faigafaiva le talafeagai, e pei o fanaia, ava niukini vaila'au oona, faatasi ai ma le faaaogaina o lama moliuila ma mea manava”

Faasalaga

O se tagata o le afioaga e solia lenei tulafono, o le a faia iai le finagalo o Alii ma Faipule o le afioaga, ae a le usitaia, o le a molia loa i le tulafono a le Malo.

O tagata mai isi afioaga e solia lenei tulafono, o le a molia sa'o i le tulafono a le Malo.

Fuafuaga Faataatitia a le Ofisa o Faigafaiva

O le a fesoasoani atu le ofisa i le tuuina atu o faamatalaga e faamalamalama atili ai lenei tulafono.

5.6 Ia faasalalauina tulafono a le Afio'aga.

Otootoga

O faasalalauina i leitio, televise ma nusipepa, o nisi ia o auala talafeagai lelei e momoli atu ai ni feau taua aemaise ai o le faalauteleina o ni fuafuaga ua saunia. E le gata i lea, o le a silafia ai e le mamalu o le atunuu, malamalama ma manino lelei i le aotelega o le faatauaina, ma le malu puipua o le siosiomaga o le gataifale o le afio'aga.

Fuafuaga faataatitia a le Afio'aga

Ua fautuaina e le Komiti (KFVL) le faasalalauina o tulafono a le nuu ua faamoemoe ma faaagaga mo le puipua o le siosiomaga o le gataifale ma ona tamaoaiga. O faasalalauina i leitio, o le a gafa lea ma Alii ma Faipule. O le Komiti (KFVL) o le a latou faamaopopoina aemaise le tapenaina o faasalalauina e faatatau i tulafono e puipua ai le siosiomaga o le gataifale ma le va'aia lelei o i'a ma figota.

Autu o le Faasalalauina: **“Puipua o le Gataifale o Solosolo”**

Fuafuaga faataatitia a le Ofisa o Faigafaiva

O tulafono uma a le afioaga mo le puipua o le gataifale e tatau ona sainia e le Faatonusili o le Matagaluega o Faatoaga ma Faigafaiva ina ia avea ai ma tulafono lagolago (By-laws).

5.7 Ia aoina mai i uta le alamea ma faatama'ia ai.

Otootoga

O le alamea o se meaola o le ituaiga o le aveau ma e nofo i luga o le aau. O lenei meaola e na te 'aina meaola ninii ua ta'ua o polipe, o loo tutupu mai ai amu. A oo ina faateleina lena meaola, o le a faapena ona latou faatamaiaina se vaega tele o le aau ma avea ai o se tulaga pagatia o le a feagai ma le tele o meaola o loo faalagolago i le aau mo nofoaga ma meaai. E le mafai ona faaumatia pe tapeina le alamea i le vaevaeina a lona tino, aua e mafai e nei itu tino ona faatupuina mai ai nisi alamea fou. Seia vagana lava ua aumaia i uta i le pa'umātu e faamagoina ai pe tanuina foi.

Fuafuaga Faataatitia a le Afio'aga

Ua faailoa mai e le Afio'aga o le alamea o se tasi lea o faafitauli o loo iai i le gataifale. E le gata i le faatamaiaina ai o amu, ae a'afia ai foi le soifua o tagata faifaiva, ma ua tuuina atu faafautuaga e le Komiti Faufautua mo le Va'aia Lelei o i'a ma figota (KFVL) ia fautuaga e pei ona taua.

Fautuaga

Ua fautuaina e le Komiti (KFVL) le mamalu o le afioaga ina ia faia se galuega mo le aoina mai i uta o alamea ma faalala ai i le pa'umatu poo le tanuina foi, mai lea vaitaimi i lea vaitaimi, pe a va'aia i le gataifale.

Fuafuaga Faataatitia a le Ofisa o Faigafaiva

E leai se polokalame a le Malo ua fuafuaina e totonu ai le faatamaiaina o le alamea vagana ai ni fautuaga e fesoasoani atu ai le Ofisa o Faigafaiva i auala talafeagai e tineia ai lenei meaola faalafua.

5.8 Ia iloiloina le tulaga talafeagai o le faasaoina o se vaega o le gataifale o le afio'aga.

Otootoga

O se vaega o le gataifale ua faasaoina e tatau ona le toe aafia i ni faigafaiva. O le avea o se vaega o le gataifale ma vaega faasao, e ao ona aafia ai le malu puipua o le siosiomaga ma ona tamaoaiga (i figota ma i'a). O lenei vaega faasao, o le a faasaoina ai amu, aau faapea fo'i ma i'a ina ia mafai ona maua e nei meaola le avanoa e tautuufua ma fanafanau ai. O le autu taua lava, o le a avea lenei faasao ma puna'aga o i'a ma figota e mafai ai ona toe faaleleia nisi vaega o le gataifale ua afaina. O le a fanafanau ma tautuufua i'a ma figota o lo'o aumau i le vaega faasaoina ma tafea atu o latou fua fanau ma faatupuina ai nisi meaola fou i nofoaga ua le maua ai ni i'a ma figota. O le a le pine ona manuia ai i tatou ae faapea foi tupulaga o le lumanai.

Fuafuaga faataatitia a le Afio'aga

O le afio'aga e ao ona:

- Galulue faatasi ma lagolagosua i le aufaigaluega a le Ofisa o Faigafaiva, i le faatinoina o iloiloiga o le tulaga talafeagai o se vaega o lona gataifale, e avea ma vaega faasaoina.
- Talanoaina ma auiliiliina le lipoti ma ia faia se faaiuga i le faavaeina o le vaega faasaoina.

Afai ae finagalo le Fono i se tasi, poo fuafuaga uma ua taua:

- Ia faatinoina loa fuafuaga mo le faavaeina o le vaega faasao e pei o le mataituina, tausiga, ma le va'aia lelei o se vaega ua atofaina.

Fuafuaga faataatitia a le Ofisa o Faigafaiva

O le Ofisa o Faigafaiva o le a:

- Faatinoina le iloiloga o le tulaga o se vaega o le gataifale e avea ma vaega faasaoina.
- Saunia le lipoti mo le tuuina aloaia atu i le Komiti o le Pulega o faigafaiva ma le Fono.

Afai ae finagalo le Fono i se tasi, poo fuafuaga uma ua taua:

- Pe a tusa ai, o le a tuuina atu ni fautuaga ma ni faamatalaga mo le tausiga, pulea ma le vaaia o le vaega faasaoina o le gataifale o le afio'aga.

5.9 Ia iloiloina le tulaga talafeagai ma le lelei o le gataifale mo le tufaina atu ma le faa-faatoagaina o nisi figota.

Otootoga.

O le tufaina atu ua faatatau lea i le aumaia o ni figota mai se isi atunuu ma tufa atu e faaola i se ogasami ua talafeagai. O le faafaatoagaina ua faatatau lea i le faaolaina o figota i se nofoaga ua saunia. O le tufaina atu ma faafaatoagaina, o nisi nei o atina'e mo le faatupuina o figota aua mea taumafa mo le afioaga. O nei auala faa-atina'e e moomia ai lava le galulue filiga ma le faamaoni o le Afio'aga ina ia ausia se taunuuga lelei.

Faamatalaga faaopoopo – Tufaina o figota.

O le tufaina atu ua faatatau lea i le aumaia o ni figota po'o se ituaiga o figota mai se isi atunuu e faaolaina i se ogasami ua talafeagai lelei. O le tufaina o le figota o le aliao i le tele o atunuu o le Pasefika, ua mautinoa ai le tele o ni faamanuiaga na mafai ona seleseleina e nei atunuu. I Fiti, na mafai ona toomaga iai tagata i le aano o le aliao e avea ma mea taumafa. O lona atigi na mafai ona faatauina atu e gaosi ai faamau o ofu i fale gaosi mea I le Atu Kuki, e tusa ma le 280 aliao na tufaina atu iai ma na mafai ona maua mai ai se aofaiga e tusa ma le 200 tone o atigi aliao i le tausaga na faatauina ai i fale gaosi faamau. I le 1990 na tufaina atu ai i sami o le motu o Namua i Aleipata le 40 aliao, ma e le o mai iloa tonu le tulaga ua oo iai nei aliao.

I le tele o vaega o le aloalo ma le aau o Samoa i Sisifo, o loo maua ai figota e pei o le pae, asi ma le tugane. O nei figota ua mautinoa lo latou faaitiitia talu ai o le fagotaina e tagata mo mea taumafa, ae sa faapena foi ona faatama'iaina o latou nofoaga, ua le toe maua ai ni figota. Pau le faamoemoe o le aumaia lea o ni figota mai nisi atunuu ma tufaina atu i ai aua le faaolaina i nei vaega o le gataifale.

Fuafuaga Faataatitia a le Afio'aga

E ao i le Afio'aga ona:

- Galulue faatasi ma le aufaigaluega a le Ofisa o Faigafaiva i le faatinoga o le iloiloga, pe talafeagai ma lelei le gataifale i le tufaina atu ma le faafaatoagaina o figota.
- Auiliiliina o le lipoti i suesuega o le talafeagai o le gataifale ma ia faia se faaiuga i le faatinoina o nei atinae i totonu o Solosolo.

- Galulue faatasi mo le puipuia o nei atinae ma le va'aia o tagata o loo latou faatamaia ma solia tulafono e faataata i nei atinae.

Fuafuaga Faataatitia a le Ofisa o Faigafaiva.

O le a o'atu se alii ofisa mai le vaega suesue, ma suesueina le gataifale o le afio'aga, ina ia faamaonia le talafeagai mo le faaolaina ai o nisi o figota. O le a mafai ona tuuina atu ni figota pe afai o le a faamaonia le talafeagai o nei nofoaga mo ia atinae.

Pe a faataunuuina leni fuafuaga, o le a:

- Fesoasoani mai le Ofisa e ala lea i le va'aia ma le mata'ituina o le sologa lelei o le tuputupu a'e o figota ua atina'eina.
- Saunia ni aoaoga mo le faamalamalamaina o olaga faanatura o nei figota.

5.10 Ia una'ia faigafaiva i tua'au ma a'oa'oga mo faigafaiva.

Otootoga

E mafai ona faaleleia le tamaoaiga o i'a ma figota maua i aloalo, aau ma vaega o le gataifale ua faaleagaina, pe afai ae faaititia le fagotaina o nei vaega o le gataifale. O se tasi o auala e faaleleia ai le tamaoaiga o le gataifale, o le fagotaina lea o ogasami o le gataifale e lei fagotaina lava, aemaise o tuā'au mamao. Ua iai le talitonuga i le Komiti Faufautua mo le Va'aia Lelei o i'a ma figota (KFVL), e ao ona una'ia faigafaiva i tuaau ma a'au mamao ina ia tuumamaina ai le fagotaina o i'a ma figota o le a'au ma le aloalo. Ua le gata foi i lea, ae o le a mafai ai ona toe faatupulaia ma faaleleia ai le tamaoaiga o le tele o vaega o le gataifale ua faaleagaina. Talu ai ona o le tele o nuu e leai ni vaa e talafeagai mo fagotaga i tuā'au, o lea ua taumafai ai le Ofisa o Faigafaiva e saili fesoasoani mo le faafigofieina o le mauaina o ni vaa talafeagai mo lea faamoemoe.

Fuafuaga Faataatitia a le Afio'aga.

Ia talosagaina le Ofisa o Faigafaiva ina ia faatinoina se a'oa'oga i auala tau faigafaiva e a'oa'oina ai le autatai o le nuu ma ia faatautaia e se Alii Ofisa o Faigafaiva ua i ai se tomai faapitoa tau faigafaiva.

Fuafuaga Faataatitia a le Ofisa o Faigafaiva.

O le a iloiloina e le Ofisa o Faigafaiva manaoga i auala tau faigafaiva e ao ona fesoasoani ai e a'oa'oina ai le mamalu o le autatai o le afio'aga. O itu taua o le a a'afia i nei a'oa'oga, e pei o le:

- Teuina ma le va'aia lelei o i'a
- Saogalemu i luga o le sami
- Tausia o afi o vaa
- Faaasuina o i'a ma isi lava mataupu taua

FAAMATALAGA FAAOPOPO

Vaa mo fagotaga i tuā'au – o le leai o ni vaa talafeagai mo fagotaga i tua'au, o le ala lea ua avea ma faafitauli o le una'ia o faigafaiva i tuā'au. E leai se vaa fagota e i le va o alia ma le paopao, ma o se vaa i lea va ua talitonuina o le a talafeagai mo faigafaiva i tuā'au. I sailiiliga a le Ofisa o Faigafaiva i se vaa talafeagai, ua filifilia ai le vaa e i le va o le 14 - 16 ft. O lona tau e \$9,800, tuufaatasi iai ma lona afi (15HP) ma nai mea fagota, o le taula,

ofu faaola mo le saogalemu i luga o le sami, ma foe. O loo iai se fesoasoani a le Faalapotopotoga a le Iuni a Europa (EU) mo le faatupeina o le 65% o le tau atoa o le vaa (\$9,800), o le 35%, o le sao lea o se afio'aga poo se faalapotopotoga ua auai i le polokalame a le Vaega o Faigafaiva.

O lenei ituaiga vaa e mafai ona faa'auvaaina e ni tagata se toalua pe toatolu foi, ma e mafai ona faaogaina lenei vaa i faigafaiva i tuā'au. O le a faia foi ni aooga mo le saogalemu i luga o le sami, teuina ma le vaaia lelei o i'a, tausiga o vaa atoa ai ma le faiga o mea fagota.

5.11 Ia fa'aaogaina le Mana o Talosaga

Otootoga

O talosaga ma talitonuga tuufaatasi faale-lotu, o se tasi lea o faamoemoega ua talitonuina lona taua auā le puipuia ma le faasaogalemuina o le siosiomaga o le gataifale ma ona tamaoaiga.

Fuafuaga faataatitia a le Afio'aga

O le sao taua o le aufailotu, o le una'ia lea ma faamalosi'au i tagatanuu ina ia latou faatauaina le puipuia ma le faasaoina o le siosiomaga o le gataifale ma ona tamaoaiga. O se sao taua tele le tuufaatasia o finagalo o tagata ina ia galulue faatasi ina ia foia faafitauli o loo alia'e mai i le siosiomaga o le gataifale ma ona tamaoaiga. Ua lagolagoina foi e le Komiti (KFVL) lenei fautuaga ma fautuaina ai le galulue faatasi o le aufailotu ma le mamalu o le afioaga ina ia faia ni talosaga e talosia ai le puipuia o le siosiomaga o le gataifale.

Fuafuaga faataatitia a le Ofisa o Faigafaiva

O le a mafai ona tuuina atu ni fesoasoani mai le Ofisa mo le mamalu o le aufailotu e ala i pepa o faamatalaga ma tautalaga ina ia fesoasoani i le tapenaina o a latou lauga ma a'oa'oga mo le puipuia ma le faasaoina o le siosiomaga o le gataifale ma ona tamaoaiga.

6. TALOSAGA

6.1 Talosaga a le Afio'aga

O nei talosaga sa mafai ona tuuina mai e sui o le afioaga sa auai i fonotaga ma le Ofisa o Faigafaiva i taimi o faatalatalanoaga i vaega e tolu. O talosaga uma foi la ua tuuina mai sa faamautuina e le Komiti (KFVL) i le latou fonotaga ma le Ofisa. Pe a talafeagai, o nei talosaga o le a mafai ona iloiloaina e le Ofisa o Faigafaiva mo le faataunuuna pe a maea le taliaina o lenei tusi e le Pule mamalu a Alii ma Faipule i le Fono tele e faia i le aso 27 Aperila, 1998.

O talosaga uma sa tuuina mai o loo faailoa atu i lalo:

- Faasao
- Faisua
- Vaa fagota
- Tilapa

- Nisi figota
- Aoaoga tau faigafaiva

7. TOE ILOILOINA O LENEI FUAFUAGA TATAU

Otootoga

O lenei fuafuaga ua faaalua ona o se toe iloiloina o lenei Fuafuaga Tatau mo lona agai i luma atoa ma lona toe suesueina ina ia faailoa ai le taua ma le aoga o lenei polokalame i totonu o nuu ma afioaga. Atoa ai ma se auiliiliga maumaututu i le tulai mai o galuega fai a le afioaga ma le Ofisa o Faigafaiva i le faataunuuina o Fuafuaga Faataatitia a le afioaga ma le Ofisa o Faigafaiva e pei ona ta'ua i luga i lona Vaega 5. O lenei foi iloiloiga e lipotia ai le alualu lelei ma ni faaletonu i totonu o le Polokalame talu ona faavaeina i totonu o afioaga.

Fuafuaga faataatitia a le Afio'aga ma le Ofisa o Faigafaiva

Ua iai le maliliega a le Komiti (KFVL) a Solosolo ma le Ofisa o Faigafaiva o le a toe auiliiliina lenei Fuafufuaga Tatau pe a mae'a le ono (6) masina talu ona pasia lenei tusi i le Fono Tele i le Aso 27 Aperila, 1998. O le a toe feutagai ai le Komiti ma le Ofisa i se aso o le a atofaina pe a atoa le 6 masina.